

四庫全書

集部

欽定四庫全書

集部

宋元詩會卷五

六

詳校官中書

臣陸湘

主事銜臣徐以坤覆勘

總校官知縣臣繆琪

校對官中書臣牛孫文

謄錄進士臣沙重輪

欽定四庫全書

宋元詩會卷五

兵部主事陳焯編

劉筠

字子儀大名人舉進士為館陶縣尉會詔試選人
校太清樓書楊億擢筠第一以大理評事為祕閣
校理真宗垂意篇籍筠預修圖經及冊府元龜推
為精敏書成進左正言直史館遷左司諫知制誥
進翰林學士初筠嘗草丁謂罷相制及謂復留令
別草制筠不奉詔乃更召晏殊殊遇筠出院側面
而過不敢揖蓋有所媿也帝疾謂浸擅權筠遂請
外補知廬州仁宗即位召為翰林學士俄拜御史

中丞進承旨判尚書都省再知廬州卒筠初為楊億所識拔後遂與之齊名時號楊劉晚為同姓富人奏求恩澤士論少之所著凡七集

赴郡之初尋屬愆亢有司舉舊典取湫水徵巫覡以致禱而涉旬靡應農事方急遣罷去越朔日乃雨

優詔將州任視政纔旬時田畯訴炎暵坐虞多稼姜雲將掉頭去波臣涸轍悲行部殊未及隨車杳難期往慙神父化

鮑惠守南陽吏民號為神父

今取旱母嗤

蕭雅所至必赤地大旱人號為旱母

諸曹白事者雱典舉舊規郡北岐棘山上有三湫池衙
吏潔齊往汲水置縹瓷朝服領巫覡詰旦迓諸岐承以
結綵輿奉於五龍祠自是率賓介寅午款於斯紛敷薦
楮鏹浸漬灑楊枝瓦鑪松香鈍瓢樽黍酌醕四壁繪神
變正筵塑靈儀怖若葉公牖怪甚葛仙陂老覲十數輩
勃屑頭如魁童巫及伶倡貌寢語嚶嚶但多壘盎質曾
乏婉孌姿交手操鈴拂合譟屢傲傲喧塵著蓬髮穢汗
落粉頤一聞且一嘔掩鼻以攢眉躋蔚朝待族敗革震

散之吳飄暮欲息竅竹呼復來慢黷固已甚誕妄相馮
隨如是者浹日僅得沾服滋嗟予政無狀百拜胡敢辭
矧夫民習俗姑用慰齋咨神道貴得一何乃託邪師遽
俾送湫勺撤役勤繭絲申明恤刑詔撻重捨輕疑從此
四五日油霈洽封圻周官地官職皇舞雖有祈道經泣
天下傷民誠弗為惟神稟聰正遠鬼務肅祇願守有常
惠可戒興妖思

禁中庭樹

紫闥分陰地丹條擢秀時高枝接溫樹密葉覆辛夷夜
影瑤光接晨英玉露滋乘春好封植為賦角弓詩

槿花

紫霧函燈檠彤霞逼綺寮吳宮何薄命楚夢不終朝半
被曾羞問鄰牆却悔招莫移風雨怨更囑鵲為橋

即目

地僻無車轍心灰欲坐忘疾雷徒破柱幽草不迎涼日
烈蟬遺蛻花休蜜滿房覆觴知已久寧有次公狂

夕陽二首

夕陽堪極目，況復近秋殘。
塞迴橫烟紫，江清照葉丹。
五胥嗟路遠，潘子念行難。
更有蕪城恨，城空逼夜寒。
瓊藥滋晨飲，青縑擁夜衾。
萬年宮省樹，五色帝家禽。
詔草裁藤角，薰爐燼水沈。
浴堂還獨對，鳴佩有清音。

偶懷

不才甘客難，多病豈旬休。
可待乘軒寵，終慚舐痔求。
渚蘭薰露夕，江橘富霜秋。
養拙寧無地，千波一葉舟。

寄靈仙觀舒職方學士

石渠仙署久離羣，抗迹丹臺世絕倫。
揚子不甘嘲尚白，漆園終許自全真。
紫烟深處鸞雙舞，朱髓成來鳥共伸。
若向雲中見鷄犬，可能渾忘姓劉人。

題林處士淝上新屋壁

久厭侯鯖盡室來，卜居鄰近釣魚臺。
舊山鶴怨無錢買，新竹僧同過宅栽。
斗酒誰從揚子學，扁舟空訪戴逵回。
抽毫有污東陽望，但惜明時老澗才。

始皇

利觜由來得擅場盡遷豪富入咸陽
屬車夜出迷雲雨峻令朝行劇虎狼
前殿建旗臨紫極東門立石見扶桑
侍臣嘉頌徒虛美不奈盧生識國亡

漢武

漢武天臺接絳河半涵飛霧鬱嵯峨
桑田準待他年變瓠子先成此日歌
夏鼎幾遷空象物秦橋未就已沈波
相如作賦徒能諷却助飄飄逸氣多

南朝

華林酒滿勸長星青漆樓高未稱情
麝壁燈迴偏照日
雀航波漲欲浮城鐘聲但恐嚴妝晚
衣帶那知敵國輕
千古風流佳麗地盡賒哀思與蘭成

唐明皇

歲歲南山見壽星百蠻回首奉威靈
梨園法部兼胡部
玉輦長亭復短亭河鼓暗期隨日轉
馬嵬恨血染塵腥
西歸重按臨波舞故老相看但涕零

宋玉

楚國荒驕日已深山川朝暮劇登臨
曾傷積毀亡師道祇託微辭蕩主心
江草東西多恨色峽雲高下結層陰
潘郎千載聞遺韻又說經秋思不任

成都

鏤膚剝俗恣遊遨種得蹲鴟號富饒
井絡共知天與險蠶叢無奈世興妖
杜鵑積恨花如血諸葛遺靈栢半燒
才似文園何足道一生琴意祇成脩

舊將

幾年塵套復征蠻
分閫功成兩鬢斑
新畫儀容當漢閣
舊銘勲業在燕山
龍泉照步文犀澁
馬埒堆金駿足閒
時泰無因問克國
曉牕風雪夢陽關

公子

油壁香車隔渭橋
黃山路遠苦相邀
行庖爨蠟雕胡熟
永埒鋪金汗血驕
別館橫陳張靜婉
期門長揖霍嫖姚
注鉤握槊曾無憚
綠桂膏濃曉未銷

洞戶

百尺青樓大道邊
五陵游騎曉翩翩
不思夜魄過三五
祇問春醪賞十千
密鎖香雲深處戶
亂飄梨雪晚來天
愁眉豈待歌成後
咫尺河陽信未傳

淚
二首

雍門琴罷已浪浪
更上牛山半夕陽
楚澤雲迷千里目
薊門歌斷九迴腸
寒梅帶雨飄離席
尺素停燈作報章
湘水未乾終未盡
豈徒萬點寄疎篁

含酸寤歎幾傷神
嗚咽交流動滿巾
建業江山非故國
灞陵風雨又殘春
虞歌訣別知亡楚
燕酒初酣待報秦
欲訴青天消積恨
月娥孀苦更愁人

直夜

二首

雞人肅唱發章溝
漢殿重重虎戟稠
翠羽欲栖溫室樹
金波先上結璘樓
風來太液聞鳴鶴
露卷明河見飲牛
萬國表章頻奏瑞
手批天語思如流

嘉木清音接綺牕
謫仙風骨凜冰霜
堯厨蕙脯分珍膳

漢廟含桃和酪漿
磴道神行通碣石
井榦雲構俯瑤光
金缸璧月相暉映
獸口時飄侍史香

無題 二首

曾許千金答浣沙
越溪浪淺不通槎
曉樓簾卷還疑霧
外苑牆低却映花
滿目離愁頻駐馬
一春幽夢祇驚鴉
柔桑蔽日南城路
懊恨羅敷自有家

星爍銀鞍狹路逢
長裾連帶任流風
身輕近識吳宮燕
目斷還驚洛浦鴻
未許香囊安肘後
獨憐丹枕在房中

南園蝴蝶飛無限一一雌隨一一雄

請急懷希聖

轆轤風檐乳燕翔浴蘭衣綵蕈流黃雲容倏變千峰險
草色相沿百帶長旋製紫荷供索筆暗移神蔡恐堵牀
思君只欲傾家釀待漏同誰賦栢梁

秋夕

枳落莎渠急夜蟲脩然平子四愁中栗林忽感雕陵鵲
雲表初過代嶺鴻阮籍卧帷疎鑒月馬融橫笛遠含風

即兼吏隱前賢事猶勝楊岐泣斷蓬

問人疾

撫枕悽然掩北軒漢庭誰問馬文園風簷鴟嘯厨烟絕
月樹烏驚藥杵喧戲習五禽成妙術學虧一簣阻微言
不因九奏清塵起天路應迷簡子魂

燈夕寄懷

千輪佛火照層城九陌香車擊迅雷簡子心知天帝樂
孟家惟信紫姑靈金徒抱箭催壺水玉宇來風滿砌莫

簾卷文疏蓮燭燼通中枕上獨聞鈴

艷體二首

走馬章臺冒雨歸後門猶待滯前期荷心出水終無定
蘿蔓從風莫自持複帳麝輕難辟惡曲房蠶嬾不成絲
漸漸隴麥藏鳴雉更恨如皋一箭遲

簾聲燭影浪多疑仙穀何能為解迷藻井風高蛛壞網
杏梁春晚燕占泥更看山遠堆凝黛縱許犀靈祇駭雞
枉裂霜繒幾千尺紅蘭終夕露珠啼

代意

華池阿閣不相容，濁水清塵恨莫窮。
明月自新班女扇，行雲無奈楚臺風。
乳鶯啼曉銷蘭炷，媚蝶傷春失蕙叢。
縱使多才如子建，祇能援筆賦驚鴻。

李舍人獨直

卿霽重重覆碧門，獨揮鴻筆坐西垣。
誠明自有中和氣，潤色還多郁穆言。
內苑朱櫻和酪賜，前階紅藥任風翻。
紫絲新履回翔地，應笑東方避世喧。

初秋屬疾

秋陰淒淡隔重城一畝居仍近禁營漢苑樓臺沈暮影
謝家鼓吹發新聲烟昏露井殘桃墜葉下涼波獨鳥驚
節物變衰吟更苦可堪漳浦卧劉楨

暑夜

芒燠盛真正渾儀休問探湯向小兒盡日羽陵開壺簡
幾人河朔飲芳卮堯厨萐脯頻搖處漢殿相風未轉時
爭得琴高借雙鯉暫遊姑射對冰姿

與啟明

秦瘳從來易得車
邵枝今比我何如
垂天借喻齊諧志
握火尋盟越絕書
旭日西清雲幄密
朔風南陌葦衣疎
故山夜鶴空多怨
金屋人爭誦子虛

秋夕池上

殺青和墨度流年
飽食無功鬢颯然
却憶侯封安邑棗
不能兄事魯褒錢
千峰月白烏啼樹
六幕風高鶚在天
招隱詩成誰擊節
願傾家釀載漁船

送客不及

日上旗亭第五重
百壺春釀與誰同
黃山遠隔奔霄騎
紫塞孤飛避弋鴻
湘竹幾時休染淚
楚旌終日自搖風
此情不及歌楊柳
一尺魚書萬水中

送許洞歸吳

欲折瑤華向綠疇
風光滿目盡離愁
茂林脩竹多嘉客
萬壑千巖憶舊遊
漢詔已聞求泛駕
禰狂無自屈岑牟
荆山待價何憂晚
龜手猶期裂地酬

七夕

靈匹迢迢駕七襄暫陳雲幄對星潢已看素魄過三讓
何用華燈更九光玉腕雙絲輕宛轉霞衣雜佩暗丁當
誰言巧意能勝拙祇見鳩閒鵲自忙

館中新蟬

庭中嘉樹發華滋可要螳螂共此時翼薄乍舒宮女鬢
蛻輕全解羽人尸風來玉女烏先轉露下金莖鶴未知
日永聲長兼夜息肯容潘岳到秋悲

暑詠寄梅翁

石渠炭業亘垂虹
玄蔭清流接桂宮
玉女壺敲天未笑
羲和轡緩日方中
孝先便腹無寧誚
痴僂承蜩敢銜功
蠲渴欲來飛雪散
南昌世胄有仙風

懷舊居

毛竹千叢蔽野亭
曉猿驚後亂峰青
漢庭已奏三千牘
周室仍繙十二經
紫殿深沈頻視草
緇帷寂寞自飛螢
振衣本為蒼生起
肯向荀家祇聚星

鶴

碧樹陰濃釵砌平華亭歸夢曉頻驚仙經若未標奇相
琴操何因寄恨聲養氣自憐雞善勝全身却許雁能鳴
芝田玉水春雲伴可得乘軒是所榮

苦熱

六幕雲收萬籟沈結瑤千尺倦登臨七盤妙舞頻揮汗
五色嘉瓜互鎮心極目嶺梅寧止渴拂波宮柳漫垂陰
祇憂火解神仙骨賴有泉聲發素琴

柳絮

半減依依學轉蓬
斑駁無奈恣西東
平沙千里經春雪
廣陌三條盡日風
北斗城高連蟻蝶
甘泉樹密蔽青蔥
漢家舊苑眠應足
豈覺黃金萬縷空

梨

玄光仙樹阻丹梯
御宿嘉名近可齊
真定蚤寒霜葉薄
樊川初曉露枝低
先時櫻熟煩羊酪
遠信梅酸損瓠犀
宋玉有情終未識
蔗漿無奈楚魂迷

纂修述懷

良弼論思暇英才視草餘西清承密旨東觀類羣書左
氏先經日征南發例初編年終顯惠歷帝自几遽一覽
無前古三長豈後予宏綱提要妙至論絕蘧蔭訛謬刊
三豕公平喜衆狙菁英咸采掇疣贅悉消除組織千章
合研竊萬象書胡為參也魯亦造仲尼居處末加駢拇
于中或輔車乘軒思衛鶴努力訪劉驢見彈曾求炙臨
川復羨魚孰云貂可續自愧鶡難如蚤入希東郭先知

服子與直非頭似筆知謝里名樗蝸舍遊從寡鵲衣禮
貌疎寸陰嗟荏苒十駕敢躊躇天祿揚雄閣承明嚴助
廬時陪折俎宴頻異帶經鉏繫日親函丈他門絕曳裾
卓錫雖有地擔石尚無儲獵犬方勞指神龜可避漁屠
門誇大嚼鼠壤鄙餘蔬闕里辭難措漳濱病且祛學勤
徒力爾性拙奈天歟大道今興起先生意卷舒正為王
者瑞何羨使君旂暗室欣觀火顏波賴決渠當仁如退
讓末跡定淪胥

夜讌

玳押風簾薄金徒漏箭長食魚齋上客置醴漢元王芥
醬辛初和蒨齏冷乍嘗巢笙傳曲沃操鼓發漁陽吟燭
惟憂盡杯籌豈易防齒犀融嶸雪栢麝薦荀香笑逐呼
盧勝歌隨解佩狂遺簪兼墮珥流盼復回腸綵鳳尋仙
吏斑駁待陸郎主歡殊未已投轄在銀牀

別墅

盛槩復風流交通遍五侯鳴鐘平樂宴擊鞠茂陵遊狡

兔方多穴蒼鷹始下鞬鉗奴藏廣柳劍騎騁長楸雲際
尋幢伎花間笑甃樓害先除白額夢已應黃頭燕酒惟
增氣秦箏漫送愁鴻毛輕一死祇待報私讐

致齋太乙宮

紫館天神貴綸闈地望清齋宮奉蠲潔攝事罄誠明殿
翼如軒翥壇垓類削成直官琳札密太宰繡衣輕薜荔
羅芳席虹蜺曳綵旌星陳五帝佐醴薦一元牲蒼馬回
風馭珍禽警露聲丹霞升曉氣若木競新英挹袂寧無

友凌霄自放情受釐宣室對賈傅異諸生

宣曲

八月收民算三千異典章天機從此淺國艷或非良玉
戶銅為沓羅幃象作牀驪姬初悔泣飛燕近專房蓮小
才承步梅新競試妝盡知春可樂終歎夜何長取酒臨
邛遠吞聲息國亡難銷守宮血易斷舞鸞腸百草兼花
鬪雙鈎映燭藏金人須手鑄虎園更身當步輦回長樂
飛除接未央琳珉飭歡館藻繡裒周牆厭火雙魚尾鳴

弦小雁行雲疊澄灝氣綺井激回光路有斯須隔憂難
頃刻忘新聲來樂府別寢近溫湯虹跨層臺晚螢飛下
苑涼錦帷迎七夕蓬餌薦重陽九畹蘭承露三江橘帶
霜方資裂繒笑可要盪舟狂並釣池魚小重衾穴鳳翔
珊瑚分碧樹火齊列清防背枕生幽怨登樓多遠傷下
陳無自媿人毘劇豺狼

前檻

垂柳陰森院游絲曠蕩春衡皋誰駐馬羅襪自生塵四

姓良家子三年賦客鄰折腰行太緩連瑣語何頻倭墮
雲爭媚便娟月鬪新滅瘢難辨玉約指不勝銀電笑投
壺勝江澄擣練勻東南勞鶴望西北限牛津寶唾凝蘭
氣鳴黃咽絳唇籠禽思隴樹洞犬謝秦人咏絮才無對
聞琴意始真長安足輕薄慎勿走瓊輪

秋月

瑤席留懽友金波對廣庭重簾和霧卷六幕極天青
玉東西館琉璃左右屏梁園休賦雪隋苑漫飛螢蟾滴

全供硯牛津不見星綺牕分皎皎芸閣共亭亭已喪應
劉魄誰通鮑謝靈欲銷千里恨魯酒薄還醒

清風

閭闔重門啟飛廉別館深煇蒸全已却雅興可能任雲
起汾河詠旌搖楚國心過簫添爽籟拂野蕩層陰夕勁
淮陽桂晨棲越鄂衾登高從落帽安寢任吹襟珠網疎
難掩銅爐冷易侵急翻池上葉遙送月前砧舞袖更回
態歌梁極繞音最憐鵲鵲意瞬息度千岑

病

暫困秦王痔無疑廣客蛇職清唐內相宅僻魯東家行
藥虹梁渡披襟蕙徑斜香凝虛白室露泣紫微花冰飲
何嘗熱瓊餐益自加熊經仙有術龜息壽無涯珍簞裁
湘竹輕巾覆越紗逍遙成雅詠屬和有容巴

王左丞新菊

東閣留嘉客寒葩艷晚光秋風自蕭瑟台座對熒煌麗
奪雙南價清令九畹香嶸州霜薦味太液鵠分裳已助

蜂成蜜還隨蟻泛觴俯臨輝艾綬佩服間萸房節物傳
荆俗詩情掩謝塘更期松偃蓋永奉大清房

螢

荒郊多腐草故苑近清秋照密何勝數囊輕莫盡收月
高疑燭息天遠認星流紫桂風微急紅蘭露徧浮已能
穿永巷更欲拂高樓滅燭方無寐鳴蛩相薦愁

上巳玉津園賜宴

需雲分渥澤襖飲恣歡游緹幕侵晨設蘭泉對席流蕙

有清菴蒲玉醴湛金甌春服萋萋盛光風灩灩浮桐華
穠競發鶯語巧相求妙曲新聲合斜陽醉未休

再賦荷花

莫雨過湘渚微涼滿楚宮
濺裙無限水障袂幾多風
浪迹嫌萍實塵勞笑菊叢
氣清防麝損信密帶魚通
游女歌爭發騷人思未窮
休傳江北意月冷魏池空

水國開良宴霞天湛晚暉
凌波宓妃至盪槳莫愁歸
妝淺休啼臉香清願襲衣
即時聞鼓瑟他日間支機
繡騎

翩翩過珍禽兩兩飛牢收交甫佩莫遣此心違

櫻桃

赤水分珠樹薰風送麥秋蜀都春氣蚤漢苑夏陰稠
廟薦清和候恩頒侍從流楚昭萍已剖韓嫣彈爭投沆瀣
滋芳液醍醐助品羞玉盤光宛轉全擬付歌喉

送譯經大師

漢夢通西域逍遙廣舊園竺乾方演教金粟豈忘言
研滴寒蟾吐臺香瑞獸噴揮毫花滿袂隱几雪盈門大士

清歌發南宗密印存縱橫十二部慧日破重昏

戊申年七夕

伯勞東翥燕西飛又報黃姑織女期天帝聘錢還得否

昔人求富是虛辭

道書云牽牛娶織女取天帝錢二萬備禮久而不還被驅在營室

華寢星陳夜未央明河奕奕度神光一年暫得停機杼
不奈秋蛩促織忙

吹笙何處伴乘鸞窺牖誰人見阿環便有唐家今夕意

月和風露滿驪山

浙浙風微皎月新鵲橋橫絕飲牛津豈惟蜀客知蹤跡
更問庭中曬腹人

琥車芝駕儼清秋微雨侵宵助涕流人世莫嗟離恨苦
却應天上更悠悠

丁謂

字公言蘇州長洲人登淳化三年進士為大理評
事通判饒州踰年直史館歷轉運使工部員外郎
權三司鹽鐵副使未幾擢知制誥判吏部流內銓
真宗幸澶淵俾謂知鄆州兼齊濮等州安撫事召
權三司使上會計錄尋加樞密直學士大中祥符
初封禪議起謂與王欽若力贊天書之事凡營造

宮觀及呈獻四方祥瑞皆自兩人發之謂遂府蒙寵任拜同中書門下平章事昭文館大學士力傾寇準貶道州同列無敢言者乾興元年封晉國公仁宗即位進司徒兼侍郎為山陵使以交結近侍雷允恭事發貶崖州司戶參軍明道中授祕書監致仕居光州卒

代意

玦帶珊瑚珮解瓊楚雲無定好傷情臨卽已誤通琴意
金谷難尋辨玉聲微警單棲盤露重密含幽思畹蘭平
明珠百琲將何當悵望輕軀病欲成

梨

搖搖繁實弄秋光曾伴青稊薦武皇玄圃雲腴滋紺質
上林風馭獵清香尋芳尚憶瓊為樹蠲渴因知玉有漿
多少好枝誰最見冒霜丹顆倚鄰牆

荷花

紉蘭為佩桂為舟北渚雲飛發櫂謳已有萬絲能結怨
不須千蓋彊障羞金隄勃窣誰同上翠帶繽紛客自留
欲選浣沙傾敵國越王更起近江樓

山居

洞口清香澈海濱
四時芬馥四時春
山多綠桂憐同氣
谷有幽蘭讓後塵
草解忘憂憂底事
花能含笑笑何人
爭如彼美欽天壤
長薦芳香奉百神

荷花排律 二首

彼美秋江上塵埃恥託根
笑傾行雨國香返夢蘭魂
蛺蝶無媒妁鴛鴦見子孫
徧窺思兩槩深鎖憶重門
怯狗風波性慚留月露痕
枉將金試步千古怨東昏

相倚秋風立蘭言似有無
未饒霜女俊不愛月娥孤
力

弱烟披素心危露泣珠剪衣隨楚思幽怨寄吳觥半折
香囊解微傾醉弁扶涉江如可採百琲答輕軀

絕句荷花

夢散高唐夜正遙楚天何處不無憀秋風似會荆王意
露渚烟汀養細腰

陳彭年

真宗朝官禁近與丁謂王欽若
林特劉承珪同惡時稱五鬼

送中國長公主入道

盡出花鈿散寶津雲鬟初剪向殘春因驚風燭難留世
遂作池蓮不染身貝葉乍翻疑錦軸梵聲纔學誤梁塵
從茲艷質歸空後湘浦應無解佩人

堯山外紀載此詩又見唐律送

妓入道為楊
邨伯作較是

王欽若

新喻人少登進士真宗深器之歷官司空同平章
事性傾巧力排寇準倡為天書符瑞取悅人主詳
國史中

覺林寺

暫拂塵襟思倍清
竹風山色亂泉聲
安民功淺君恩重
又策羸蹄向古城

李宗諤

字昌武宰相昉第三子七歲能屬文恥以父任得官獨由鄉舉第進士授校書郎遷集賢校理真宗即位拜起居舍人擢知制誥景德二年為翰林學士從東封改工部郎中歷右諫議大夫卒年四十九詩見西崑酬倡集

代意

霧鸞曉影忽參差
雲雨陽臺役夢思
自是膠弦無續日

不同珪月有圓時洞房斗帳承新愛河漢星橋隔後期
綺榭凝塵斷消息抒情空擬四愁詩

南朝

仙華玉壽夜沈沈三閣齊雲複道深平昔金鋪空廢苑
於今瓊樹有遺音珠簾映寢方成夢麝壁飄香未稱心
惆悵雷塘能幾日吟魂醉魄已相尋

漢武

建章宮闕鬱岧峣露掌脩莖倚沆寥平樂館中觀角觝

單于臺上懾天驕蓬萊望氣滄波濶太一祈年紫府遙
西母不來東朔去茂陵松柏冷瀟瀟

燈夕上虢內翰

東城南陌盡遊人陌上香車起暗塵歷歷星榆光奪晝
煌煌火樹艷爭春章溝五鼓催行樂衛尉千廬罷徼巡
應念鰲山方並宿紫泥封後獨頻伸

新蟬

雨過新聲出苑牆烟輕餘韻度回塘短亭疎柳臨官道

平野西風更夕陽
八斗陳思饒賦詠
二毛潘岳易悲涼
感時偏動騷人思
不問天涯與帝鄉

勸石集賢飲

都門祖軼綺筵張
舉白無由滌羽觴
石室紬書勤亦至
金貂換酒醉何妨
甕間吏部寧須問
席上車公不可忘
應念朝來猶毳毼
解醒誰用蔗為漿

清風

閒館方迴暑
商飈乍應金
天高初起籟
松淡更宜琴
汾

棹傳歌遠班詩託興深東陽仁自布西顓氣還侵太液
翻晴旭靈和亂翠陰舟輕飛燕袂臺迴楚王襟阮嘯經
時盡齊蟬度日吟愁生孤戍角響續暮城砧室靜銷雲
縷庭虛轉蕙心賢哉吉甫頌千載有遺音

錢惟濟

見西崑酬倡集當是惟
演弟兄官恩州刺史

夜讌

清讌夜何其南亭露欲晞
踟躕霞袖舉潏灩羽觴飛
鏤

案搖花落金鐺照月輝
瑤光未西落休賦醉言歸

苦熱

蘋末風休飛閣深
亭亭日御漸流金
火雲接影橫銀漢
水鳥無聲下翠陰
渴想孤山同飲露
煩思楚殿獨披襟
蔗漿粃粒都無味
衛玠清羸欲不任

刁 衍

字元賓昇州人從李煜歸宋太祖賜緋魚授太祝
至真宗朝官比部員外郎克崇文院檢討改兵部
郎中卒年六十九其
詩見西崑酬倡集

代意

蕙時芳夕九迴腸
歛袂東牕待曉光
秦嶺樹高迷隴塞
楚天雲澹隔瀟湘
病餘公幹情多詠
秋晚安仁鬢有霜
休道鮫人落珠淚
微波還擬託陳王

漢武

高宴栢梁詞可仰
橫汾簫鼓樂難窮
已教丞相開東閣
猶使將軍誤北戎
灑淚甘泉還有恨
祈年仙館惜成空
誰知辛苦回中道
共盡千齡五柞宮

陳越

字損之開封尉氏人少好學尤精歷代史編咸平
中詔舉賢良策入第四等由州判召遷著作佐郎
直史館歷太常丞羣牧判官擢左正言卒年
四十性嗜酒罕有醒日以是邁疾士論惜之

懷希聖

玉甃銀牀蔭碧桐北牕珍簟水紋融
衣裁練布如王導
扇執蒲葵學謝公瓊屑半和仙掌
露蘭苔輕泛楚臺風
若非冰雪神仙骨相樂誰同一笑中

舒雅

字子正久仕李唐工文章與吳淑齊名恬於榮宦
入宋為職方員外郎祕閣校理監舒州靈仙觀

答劉學士

往歲別京畿
植山與衆違
君心似松柏
雁足寄珠璣
學道情雖篤
燒丹力尚微
雲中雞犬在
祗候主人歸

答內翰學士

清貴無過近侍臣
多情猶憶舊交親
金蓮燭下裁詩句
麟角峰前寄隱淪
和氣忽飄燕谷暖
好風徐起謝庭春
緘藏便是山家寶
留與兒孫世不貧

答錢少卿

蓬萊閣下舊鄰居偶別俄驚四載餘每見寒葭思倚玉
忽臨秋水得雙魚人間貴盛君誰及物外優閒我自餘
聞說歸艍向春渚深知不與道情疎

晁迥

字明遠澶州人徙家彭門舉進士為大理評事遷
殿中丞用薦擢右正言直史館累遷工部侍郎仁
宗朝進禮部尚書以太子
少保致仕卒年八十四

屬疾

精鶩成勤瘁頤真俟有瘳吟生南越思慈結北堂憂
祭枕甘為蝶豐厨厭炙牛玄元知寡欲平子尚多愁
夕鳥侵階啄宵螢入樹流玉書能靜覽枉矢倦閒投
忽賦行雲什堪聽擊壤謳期君整朝佩仙署在瀛洲

清風

仙馭來相慰解顏良會稀病蠲宜養素趣遠欲忘機
懲躁寧無漸延齡或可祈影搖珠箔細聲泛鈿箏微
委恨餘班扇流歡入楚衣陶潛知夢穩韓壽畏香飛
氣爽蒼

龍闕涼生白虎闌健資雞距筆偷撼獸鑲扉松下琴心
逸江東膾縷肥宿懷真隱處依約與同歸

薛映

字景暘父允中仕孟蜀歸宋為都官郎中映舉進
士由理評通判昇州累遷太常丞歷制置轉運擢
知制誥仁宗朝拜禮部尚書分
司南京卒詩見西崑酬倡集

清風

爽氣乘秋至涼颿蕩暑初泠泠含遠韻撼撼動輕裾翠
幕波無際修篁韻有餘潛驚塞草綠乍拂井桐疎素髮

悲郎將霜紉感婕妤
光流熠燿簾影亂蟾蜍塵襲青
絲騎香飄紺幃車故宮經馭娑
別館度儲胥薄莫來金
埒凌晨上玉除寧同起窮巷
賸欲賦愁予

娑讀上聲

戊申年七夕

月放冷輪傍絳河相期寶婺夜
經過姮娥不惜宮中桂
乞與天香分外多

碧天如水月如鉤金露盤高玉
殿秋青烏潛來報消息
一時西望九天虬

漢殿初呈楚舞時
月臺風榭鎮相隨
如何牛女佳期夕
又待鑾輿百子池

月露庭中錦繡庭
神光五色一何鮮
世間工巧如求得
四至卿曹亦偶然

銀河耿耿露漙漙
綵縷金針玉佩環
天媛貪忙為靈匹
幾時留巧與人間

任隨

景真間太常丞直集賢
院詩見西崑酬倡集

漢武

殊庭深恨隔仙曹
桂館蜚廉事轉勞
銀闕尚沈滄海濶
井幹空拂絳河高
萑陽弋獵侵多稼
朔塞旌旗照不毛
苦信憑虛王母說
東方三度竊蟠桃

鶴

何年玉羽別昆丘
飛舞長親十二樓
警露夜窺瑤圃月
翔雲高憶海天秋
肯教渠略知遐壽
會向神區更遠遊
正是溶溪烟水碧
好陪青鳳飲澄流

劉 隲

景熹間官工部員外郎直
集賢院詩見西崑酬倡集

槿花

號國妝初罷高塘夢始迴霓裳猶未解繡被已成堆赤
帝宮簾卷華陽洞戶開神仙有良會清唱在瑤臺

漢武

高挹方諸薦水蒼醺壇時見燭神光日邊甲帳雖虛設
汾上樓船不可忘槃漑碧霄甘露白室遷幽壤瑞雲黃

東巡岱嶽探金策倒指寧聞壽數長

舊將

彊弩當年討不庭功成身退炳丹青囊沙澤畔知兵法
聚米山前識陣形驥老未甘秋伏櫪劍閒猶覺夜衝星
分茅錫土傳家牒鍾鼎還須為勒銘

館中新蟬

搖落何須宋玉悲齊庭遺恨莫沾衣池中菡萏香全減
井上梧桐葉乍飛風促箏聲隨斷續日移甌影自光輝

宜秋門外饒芳樹結廐那堪送客歸

崔遵度

字堅白本江陵人徙淄川太平興國八年進士解褐和州主簿歷著作佐郎太子中允景德初為編修官進吏部兼左諭德判司農寺天禧四年卒年六十七

屬疾

李白美初美相如渴漸瘳八磚非性嬾三昧減心憂筆苑多批鳳詞鋒勝解牛舊山疑鶴怨畏日想雲愁廣內勞揮翰通中羨枕流使君方屢降客轄未容投好奏倪

寬議何須莊舄謳朝衣薰歇不侍史待仙洲

李繼

景德間戶部員外郎直集
賢院詩見西崑酬倡集

霜月

銀牀葉暗飄霜月夜迢迢寒極金難辟憂多酒漫消
荀爐殘更換湘瑟罷仍調誰道河流淺盈盈萬里遙

懷希聖

銀闕琳房視草餘龍門岑寂斷軒車彩毫閒試金壺墨

青案時看玉字書王儉風流希謝傅子雲詞賦敵相如
瓊枝不見蕭齋晚蕙草烟微度綺疏

王左丞新菊

青規前席暇歸沐興何長北第秋將晚東籬菊正芳幽
叢霏薄霧桂色艷輕霜已近黃金印兼臨白玉堂甘疑
掩萍實秀肯讓芝房有佞還應指無憂可要忘藥浮承
相酒氣馥令君香好固松椿壽仙經識祕方

宋元詩會卷五

欽定四庫全書

宋元詩會卷六

兵部主事陳焯編

王旦

字子明大名莘人父祐宋初名臣嘗植三槐於庭
曰子孫必有為三公者旦幼沈嘿好學登太平興
國五年進士知平江縣用薦召試擢知制誥真宗
即位同知樞密院進參知政事澶淵之役旦權留
守東京未幾拜同平章事凡柄用十八年為相一
紀國有大事待以取決惟於天書封禪不敢為異
議則其相業之累云
年六十薨謚文正

十洲閣

山川如幻閣長秋一島飛來伴九洲不礙漁樵雙槳過
何妨羅綺四時遊雲疑泰華分張去水憶蓬瀛散漫浮
禁苑未知湖海樂生綃寫取獻中州

李迪

字復古幽州人少攜其文見柳開開奇之曰公輔
材也舉進士第一授將作監丞通判徐兗二州改
祕書省著作郎直史館歷陝西都轉運使入為翰
林學士請發內藏庫佐國用其料曹瑋之勝嘉勒斯
賚皆卓識可辦大事帝甚重之天禧中拜給事中
參知政事於周懷政之誅力護太子及寇準罷真

宗欲相迪迪固辭日對滋福殿皇太子出拜以得
相為賀帝顧迪曰尚可辭耶遂以吏部侍郎同中
書門下平章事會丁謂擅權迪請與謂俱罷謂出
迪知鄆州謂敗仁宗起為祕書監屢典州郡太后
崩召為資政殿學士未幾復同中書門下平章事
再出領郡以太子太傅致仕年七十七薨謚文定
題河陽後城平嵩閣

南指嵩高北太行大河中出貫霧長君王不恃金湯險
自有仁恩結萬方

王 曾

字孝先青州益都人咸平中由鄉貢試禮部廷對
皆第一以將作監丞通判濟州召試授祕書省著

作郎直史館遷翰林學士真宗晚坐承明殿召對
久之既退使內侍諭曾曰卿思卿甚故不及朝服
見卿卿勿以我為慢也其見尊禮如此遷主客郎
中歷右諫議大夫參知政事為王欽若所排出知
應天府未幾復參知政事仁宗立遷吏部尚書以
裁抑太后姻家通請謁者復出領郡景祐二年拜
右僕射兼門下侍郎同平章事
封沂國公年六十一薨謚文正

立春帖子

北陸凝陰盡千門淑氣新年年金殿裏寶字帖宜春

蚤梅

石畔籬根取次栽小園春意覺先來雪中勿問和羹事

且向百花頭上開

杜衍

字世昌越州山陰人擢進士甲科補揚州觀察推
官改知平遙縣通判晉州歷知乾州鳳翔河東陝
西轉運使召為樞密直學士出知天雄軍仁宗特
以御史中丞召兼判流內銓聲動京師寶元二年
拜同知樞密院事改副使凡內降恩多封還詔旨
寢格不行進同平章事薦引賢能阻抑僥倖小人
多不悅出知兗州慶歷七年以太子少師致仕
自是屢召不起封祁國公卒年八十謚正獻

新居感詠

無似老且病惟恐歸田遲一旦得引年九天還聽卑尚露二

品祿俾盡百年期恩深淪骨髓感極橫涕洟始營菟裘地
來向灘水湄城隅最窮僻匠者寧求竒卜築悉由已軒牖
亦隨宜外呂庇風雨內以安妻兒燕雀莫羣噪鷦鷯才一
枝因念古聖賢名為千古垂何嘗廣居室儉為後人師亞
聖樂簞食寢丘無立錐文終防勢奪景相恥家為文園四
壁立鄭公小殿移伊余具員者適會承平時無術毘萬務無
才撫四夷為郡亦齷齪勞心徒孜孜保身已天幸拊已宜
自知開卷顏間厚復懼來者嗤勗哉知止足清白猶可追

幽居即事

寂寂復寂寂告老閒居日
徑草高於人林鳥熟如客
黃卷不釋手清風常滿室
內顧平生心無過此時適

雨中荷花

翠蓋佳人臨水立檀粉不勻香汗濕
一陣風來碧浪翻珍珠零落難收拾

晏殊

字同叔撫州臨川人七歲以神童薦召試援筆立
成帝嘉賞賜同進士出身擢祕書省正字祕閣讀

書遷先祿寺丞丁內外艱皆奪服起之以左正言
直史館久之為翰林學士仁宗即位太后聽政大
臣丁謂曹利用各欲獨見奏事殊建言當垂簾聽
奏羣臣無請見理議遂定預修真宗實錄進禮部
侍郎樞密副使上疏論張者忤太后旨出知應天
府延范仲淹以教生徒學校之重興實自殊始召
拜御史中丞歷參知政事尚書左丞康定初進同
中書門下平章事為權倖所排出知潁州數徙知
河南府引疾請歸京師疾平留侍經筵薨於
位贈司空兼侍中謚元獻文集二百四十卷

和王校勘中夏東園

東園何所樂所樂非塵事野竹亂無行幽花晚多思閒
窺魚尾赤暗辨蜂腰細樹影密遮林藤梢枉冑袂潘蔬

足登膳陶秫徑取醉幸獲我汝交都忘今昔世歡言捧
瑤佩願以踈麻繼

列子有力命王克論衡有命祿極言必定之致覽
之有感

大鈞播羣物零茂歸自然默定自有初不為智力遷禦
寇導其流仲任派其源智愚信自我通塞當由天宰世
曰皋伊迷邦有顏原吾道誠一槩彼途鍾百端卷之八
纖毫舒之盈八埏進退得其宜夸榮非所先朝聞可夕

隕吾奉聖師言

西園示張寺丞

元已清明假未開
小園幽逕獨徘徊
春寒不定斑斑雨
宿醉難禁灑灑杯
無可奈何花落去
似曾相識燕歸來
游梁賦客多風味
莫惜青錢萬選才

初秋宿直

絳河星斗夜闌干
禁署沈沈閉九闕
上帝冊書羣玉府
仙人宮闕巨鰲山
涼蟾影度秋陰薄
促漏聲來夜唱閒

擁鼻吟多欲愁絕嚴鐘淒斷樹烏還

安昌侯

蓮勺移家近七遷一編經訓世相傳關中沃壤通涇渭
堂上繁音逐管絃身服儒衣同蔡義日將卮酒對彭宣
高墳丈五陽陵外千古朱雲氣凜然

崇因寺

捲簾山色眼前見入夜濤聲枕上聞苔徑雨餘堆落葉
石樓風靜鎖寒雲

雪中

平臺千里渴商霖
內史憂民望最深
衣上六花非所好
畝間盈尺是吾心

題琵琶亭

流光過眼如車轂
薄宦拘人似馬銜
若遇琵琶應大笑
何須拭淚濕青衫

詠竿戲題中書壁

百尺竿頭裊裊身
脚騰跟倒駭傍人
漢陰有叟君知否

抱甕區區亦未貧

狄遵度

字元規長沙人父裴龍圖閣直學士遵度用父蔭為襄縣主簿居數月棄去好為古文著春秋雜說多所發明尤嗜杜甫詩嘗讚其集一夕夢見甫為誦已作乃世所未見者亡何卒有集十二卷

白雲

秋風吹白雲觸處自何谷初猶半洞門歛出遍巖腹零落依水湄片段挂枯木餘影透微白滅跡混空綠烟蘿自蘄薈島漱徒縈曲安知蒼梧野下覆猿鳥哭誰能久

徘徊返顧視黃鵠

和渙之深秋月夜書事

洞庭葉下涼颼颼銀河頑白凝不流圓月擬缺不忍缺
輕露欲浮終未浮憶吹朱籟鳳輶上更採紫芝雲嶠陬
玉樓天半幾千尺珠樹玲瓏縣上頭

雨

高林風黑雨聲怒小閣燈青人語闌誰知雲外月高照
定是葉間鶯最寒時覺急飄愁未已似聞徐滴喜初翻

驪駒北首榆關路天晴烟樹沙磧寬

登樓

羣山南走失所往百川東逝茲其窮天低水國疑將壓
人過月塘愁欲空

莎青石細淺見底天空雲淡無一毫波間圓月照不動
海上清風來最高

林逋

字君復錢塘人少孤性恬淡好古結廬西湖之孤
山二十年不入城市真宗聞其名賜粟帛詔長吏

歲時勞問自為墓於其廬側既卒州
為上聞仁宗嗟悼賜謚和靖先生

閔師見寫陋容以詩奉答

顧我丘壑人煩師與之寫北山終日縣風調一何野林
僧忽焉至欲揖頃方罷復有松上猿驚窺未遑下

送牛秀才之山陽省兄

之子詠陟岡別我歲時晏後夜失羣鶴高天著行雁楚
山遠近出江樹青紅間尊酒無足辭離愁滿行盼

湖樓晚望

湖水混空碧憑闌凝睇勞夕寒山翠重秋淨雁行高遠
意極千里浮生輕一毫叢林數未遍杳靄隔漁舸

上湖閒泛艤舟石函因過下湖小墅

平皋望不極雲樹遠依依及向扁舟泊還尋下瀨歸青
山連石埭春水入柴扉多謝提壺鳥留人到落暉

湖村晚興

滄洲白鳥飛山影落晴暉映竹犬初吠弄船人合歸水
波隨月動林翠帶烟微寺近疎鐘起蕭然還掩扉

湖山小隱 三首

猿鳥分清絕林蘿擁翠微
步穿僧逕出肩搭道衣歸
水墅香菰熟烟崖蚤筍肥
功名無一點何處更忘機

園井夾蕭森紅芳墮翠陰
畫嵒松鼠靜春塹竹雞深
歲課非無秫家藏獸有琴
顏原遺事在千古壯閒心

衡門鄰晚島環堵背寒岡
片月通蘿逕幽雲在石牀
客遊拋鄆杜漁事擬滄浪
管樂非吾尚昂頭肯自方

中峰

中峰一徑分盤折上幽雲夕照前村見秋濤隔嶺聞長
松含古翠衰藥動微薰自愛蘇門嘯懷賢思不羣

小圃春日

岸幘倚微風柴籬春色中草長團粉蝶林暖墜青蟲載
酒為誰子移花獨乃翁於陵偕隱事清尚未相同

郊園避暑

柴門鮮人事氛垢頗相忘愛彼林間靜復茲池上涼託
心時散帙遲客預攜觴况有陶籬趣歸禽語夕陽

山村冬暮

衡茅林麓下春色已微茫
雪竹堆寒翠風梅落晚香
樵期多獨往茶事不全忙
雙鷺有時起橫飛過野塘

出曹州

詩懷動歎嗟驢立帽陰斜
雨灤生新鰾茅鼓夾舊槎
午烟昏獨店岡路透誰家
幾日江南興扁舟泊岸沙

留題李頡林亭

無琴枕鶴經盡日卧林亭
啼鳥舊相語幽人誰欲聽
半

蘭花藉白一徑草盤青何必對樽酒此中堪獨醒

翠微亭

亭在江干寺清涼更翠微秋階響松子雨壁上苔衣絕
境長難得浮生不擬歸旅懷何計是西崦入斜暉

埜城寺水亭

金井前朝事林僧問不知綠苔欺破閣白鳥占閒池清
楚曾經晉荒唐直到隋南廊一聲磬斜照獨凝思

聞葉初秀才東歸

高鴻多北向極目雨餘天春滿吳山樹人登汴水船吟
生千里月醉盡一囊錢肯便懷鄉邑時清復少年

和梅聖俞雪中同虛白上人來訪

湖上玩佳雪相將惟道林蚤烟村意遠春漲岸痕深地
僻過三徑人間試五禽歸橈有餘興寧復比山陰

和朱仲方送然社師無為還歷陽

歸客過東關行行一錫閒破林霜後月孤寺水邊山頂
笠衝殘葉腰裝歇暮灣香燈舊吟社清思逐師還

夏日寺居和酬葉次公

午日猛如焚清涼愛寺軒鶴毛橫蘚陣蟻穴入莎根社
信題茶角樓衣笕酒痕中餐不勞問筍菊淨盤罇

送長吉上人

囊集暮雲篇行行肯廢禪青山買未暇朱闕且隨緣茗
試幽人井香焚賈客船淮流遲新月吟翫想忘眠

春日送袁成進士北歸

春潮上海門歸雁遠行分千里倦行客片帆還送君酒

波欺碧草歌疊裏晴雲來歲東堂桂聊酬一戰勛

送史殿省典封州

馬援疎蠻邑銅標何可窮人烟時亦有海色自如空
鬕髮梅分白旌旗瘴減紅惟應蒔藥罷埋照酒醪中

送王舍人罷兩浙憲赴闕

上問還旌節明廷覲冕旒清溪傾綺席蠹簡壓歸舟
越俗今無訟閒田亦有秋公期論爵賞當拜富民侯

送昱師赴請姑蘇

同載闔閭人衣囊覆氍毹巾新烟赤岸暝融雪太湖春鐘
遠移齋候香遲上定身當知舉如意寶地雨花頻

送皎師歸越

林間久離索忽忽望西陵靜戶初聞扣歸舟又說登野
烟含樹色春浪疊沙稜幸謝雲門路同尋苦未能

送思齊上人之宣城

林嶺藹春暉程程入翠微泉聲落坐石花氣上行衣詩
正情懷淡禪高論語稀蕭閒水西寺駐錫莫忘歸

洞霄宮

大滌山相向華陽路暗通風霜唐碣久草木漢祠空劍
石苔花碧丹池水氣紅幽人天柱側茅屋灑松風

送僧休復之京師

金錫指歸鴻田衣獵曉風春江片席遠松月一房空新
句別離後舊山魂夢中到京當袖刺館閣盡名公

寄錢紫微

晞髮晨初起中丘謝病身空持白雲意遙贈紫微人畫

穀坊門遠蒼苔掖署春元和舊文體當許繼清塵

淮甸城居寄任刺史

擾擾非吾事深居斷俗情石莎無雨瘦秋竹共蟬清劍
在慵閒拂詩難憶細評寥然獨楮枕淮月上山城

寄茂才馮彭年

異代甘泉賦誰當頌太微無如摘藻妙所惜賞音稀漸
遠鄉關樹方單客子衣扁舟艤何許霰雪暮霏霏

湖山小隱

二首

道著權名便絕交一峰春翠濕衡茆莊生已憤鴟鳶嚇
揚子休譏螻蛄嘲滴滴藥泉來石竇霏霏茶靄出松梢
琴僧近借南熏譜且併閒工仔細抄

閒搭綸巾擁縹囊此心隨分識興亡黑頭為相雖無謂
白眼看人亦未妨雲噴石花生劍壁雨敲松子落琴牀
清猿幽鳥遙相叫數筆湖山又夕陽

湖上初春偶作

梅花開盡臘亦盡春暖便如寒食天氣色半歸湖岸柳

人家多上郭門船
文禽相並映芳草
翠潏欲生浮嫩烟
幾處酒旗山影下
細風時已弄繁絃

西湖春日

爭得才如杜牧之
試來湖上輒題詩
春烟寺院敲齋鼓
夕照樓臺卓酒旗
濃吐雜芳薰巖崿
濕飛雙翠破漣漪
人間幸有蓑兼笠
且上漁舟作釣師

小園春日

草烟橫碧露華微
乘興春園懶欲歸
聚散有情輸蛺蝶

淺深無色比薔薇浮名莫惜千鍾貴急景須防百歲稀
一事不堪身衣褐且偷閒眼看芳菲

夏日池上

蓮香如綺細濛濛翡翠窺魚裊水萍卷箔未生單簟月
凭闌初過一襟風橫歌片石安琴薦獨倚新篁看鶴籠
沈李凍醪無寄與可憐瀟灑興誰同

西巖夏日

蕙帳蕭閒掩敝廬子真巖石坐來初為驚野鳥巢間乳

懶過鄰僧竹裡居
新溜迸涼侵靜語
晚雲浮潤上殘書
何煩彊捉白團扇
一柄青松自有餘

秋日湖西晚歸舟中書事

水痕秋落蟹螯肥
閒過黃公酒舍歸
魚覺船行沈草岸
犬聞人語出柴扉
蒼山半帶寒烟重
丹葉疎分夕照微
卻憶清谿謝太傅
當時未解惜蓑衣

深居雜興

五首

四壁垣衣釣具腥
已甘衡泌號沈冥
伶倫近日無侯白

奴僕當時有衛青花月病懷看酒譜雲蘿幽信寄茶經
茅君使者清閒甚獨理叢毛向戶庭

冉冉秋雲抱嘯臺一丘松竹是閒媒誰聞濟北傳兵略
枉說山東出相才樵褐短長披搯膝丹爐高下疊縣胎
三千功行無圭角可望虛皇九錫來

松竹封侯尚未尊石為公輔亦云云清華自合論閒客
玄默何妨事靜君鶴料免慚尸厚祿茶功兼擬策元勳
幽人不作山中相且擁圖書卧白雲

湖上山林畫不如霜天時候屬園廬
梯斜晚樹收红柿
筒直寒流得白魚
石上琴尊苔點淨
籬陰鷄犬竹叢疎
一關兼是和雲掩
敢道門無卿相車

掉臂何妨入隱淪
高賢應總貴全真
次山有以稱聲叟
魯望兼之傳散人
拂水遠天孤榜晚
夾村微雨一犁春
不知圖畫誰名手
狀取江湖太古民

孤山寺

雲峰水樹南朝寺
祇隔叢篁作並鄰
破殿靜披瑩白古

齋房閒試酪奴春
白公睡閣幽如畫
張祐詩牌妙入神
乘興醉來拖木屐
翠苔蒼蘚石磷磷

西湖

混元神巧本無形
匠出西湖作畫屏
春水淨如僧眼碧
晚山濃似佛頭青
藥蘆粉堵搖魚影
蘭杜烟叢閣鷺翎
往往鳴榔與橫笛
細風斜雨不堪聽

平居遣興

有甚餘閒得解嘲
高慵時把几程敲
卑攷晚鳥沈幽語

歷刺疎篁露病梢
草野交遊披褐見
神仙書史點朱抄
皇朝不是甘逃遁
爭奈心嘉許與巢

池陽山居

數家村店簇山傍
下馬危橋已夕陽
驚鳥忽衝谿靄破
暗花閒墮塹風香
時間盤泊心猶戀
日後尋思興必狂
可惜回頭一聲笛
酒旗斜曳出疎篁

無為軍

掩映軍城隔水鄉
人烟景物共蒼蒼
酒家樓閣搖風旆

茶客舟船簇雨檣殘笛遠砧聞野墅老苔寒檜看僧房
狎鷗更有江湖興珍重江頭白一行

出泉水驛

曉城寒水共蕭蕭濕碧吹青路一條烟靄濃間出山驛
林蘿深裏過溪橋閒情謾會吟兼畫隱事猶輸釣與樵
多謝孤村人落外酒旗風急更相招

耿濟口舟行

環迴幾合似江干刺眼詩幽盡狀難沙觜半平春晚濕

水痕無底照秋寬
老霜蒲葦交千刃
怕雨鳬鷗著一攢
擬就孤峰寄蓑笠
舊鄉漁業久凋殘

園廬

柴關寒井對蕭辰
自愛棲遲近古人
閒草徧庭終勝俗
好書堆案轉甘貧
橋邊野水通漁路
籬外青山見寺鄰
懶為躬耕詠梁父
吾生已是太平民

雪

瓦溝如粉疊樓腰
高會誰能解酒貂
清夾曉林初落索

冷和春雨轉飄蕭堪憐雀避來閒地最愛僧衝過短橋
獨有閉關孤隱者一軒貧病在顏瓢

春陰

似雨非晴意思深宿酲牽引卧春陰苦憐燕子寒相並
生怕梨花晚不禁薄薄簾幃欺欲透遙遙歌管壓來沈
北園南陌狂無數只有芳菲會此心

山園小梅

三首

衆芳搖落獸暄妍占盡風情向小園疎影橫斜水清淺

暗香浮動月黃昏
霜禽欲下先偷眼
粉蝶如知合斷魂
幸有微吟可相狎
不須檀板共金樽

剪綃零碎點酥乾
向背稀稠畫亦難
日薄縱甘春至晚
霜深應怯夜來寒
澄鮮祇共鄰僧惜
冷落猶嫌俗客看
憶著江南舊行路
酒旗斜拂墮吟鞍

吟懷長恨負芳時
為見梅花輒入詩
雪後園林纔半樹
水邊籬落忽橫枝
人憐紅艷多應俗
天與清香似有私
堪笑羌鄉亦風味
解將聲調角中吹

蝶

細睂雙聳敵秋毫冉冉芳園日幾遭清宿露花應自得
暖爭風絮欲相高情人沒後魂猶在傲吏齊來夢亦勞
閒掩遺編苦堪恨不并香草入離騷

送范希文寺丞

林中蕭寂款吾廬疊疊猶欣接緒餘去櫂看當辨江樹
離尊聊為摘園蔬馬卿才大常能賦梅福官卑數上書
黼座垂精正求治何時條對召公車

送馬程知江州惠安

酒酣無復耿離腸一路之官盡水鄉
公癖寒生對廬阜客帆風定泊潯陽
陂涵洲渚初收潦露浥蒹葭未作霜
到日何人先刺謁二林開士在琴堂

寄宣城宗言姪

春水涵波綠渺瀰江南芳草又離離
謝家元住青山郭邵氏近攀丹桂枝
衣下香囊非爾好牀頭詩卷媿吾癡
中林獨處仍多病蚤晚能來慰所思

寄太白李山人

顏如童子髮如顰卜築深當太白西身上只衣麤直裰
馬前長帶古偏提鵑鵬懶擊三千水龍虎閒封六乙泥
幾度枕肱人跡外半牕松雪論天倪

歷陽寄金陵衍上人

蘚暈莎叢古石旁寺和松竹背秋岡騷吟未斷雲生壑
梵偈重開月照香五老舊遊應悄默六朝閒事肯悲涼
西州獨客心搖甚抹碧江天鳥一行

寄題歷陽馬文仲水軒

占得幽居近郭西
水軒風景獨難齊
烟含晚樹人家遠
雨濕春風燕子低
紅燭酒醒多聚會
粉牋詩敵幾招攜
旅遊今日堪搔首
搖落山城困馬蹄

暮春寄懷曹南通守任寺丞

跌蕩情懷每事同
十年曹社醉春風
彈弓園圃陰森下
碁子廳堂寂靜中
赤脚我猶無一婢
黑頭君合作三公
江湖今日還勞結
目送歸飛點點鴻

和陳湜贈希社師

瘦靠闌干搭梵襟
綠荷堦面雨花深
迢迢海寺浮杯興
杳杳秋空放鶴心
齋磬冷搖松吹雜
定燈孤坐竹風侵
鏘然更有金書偈
祇許神龍聽靜吟

集賢李建中工部嘗以七言長韻見寄感存懷歿
因用追和

清絕門牆冷似冰
野人懷刺昔曾登
新題對雨分蕭寺
舊夢經秋說杜陵
貧典郡符資月給
老持臺憲減秋稜

開元文字鍾王筆惆悵臨風一燼燈

讀王黃州詩集

坐吟行看對清秋懶架仍移近枕頭放達有唐惟白傳
縱橫吾宋是黃州左遷商嶺題無數三入承明筆未休
紅藥紫薇足千古又添揚子伴牢愁

孤山隱居書壁

山水未深猿鳥少此生猶擬別移居直過天竺溪流上
獨樹為橋小結廬

池上作

簇簇蒲蒲映蓼花
水痕天影蘸秋霞
分明似箇屏風上
飛起鵝鵲一道斜

葑田

淤泥肥黑稻秧青
潤益清流旋旋生
擬倩湖君書版籍
水仙今佃老農耕

山中寒食

氣象纔過一百五
且持春酒養衰年
中林不是不禁火

其奈山櫻發欲然

秋江寫望

蒼茫沙觜鷺鷥眠
片水無痕浸碧天
最愛蘆花經雨後
一蓬烟火飯漁船

詠諸葛退筆

神功雖缺力終存
架琢珊瑚欠策勛
日暮閒牕何所似
灞陵憔悴故將軍

答潘司理

庭柯雪壓已如春乘興山陰亦少人岑寂園廬何所對
酒中賢聖藥君臣

即席送江夏茂才


與君未別且酣飲別後令人空倚樓一點風帆若為望
海門平濶鷺濤秋

狸奴

纖鉤時得小溪魚飽卧花陰興有餘自是鼠嫌貧不到
莫慚尸素在吾廬

自作壽堂因書一絕以誌之

湖上青山對結廬
墳前秋色亦蕭疎
茂陵他日求遺稿
猶喜曾無封禪書



宋元詩會卷六